


蜀上停雲雅
同人唱和詩集





雅

蜀

李調元選

叢書集成初編

(補印本)

蜀雅及其他二種

一九三九年十二月初版

一九六〇年五月補印

商務印書館出版

上海大東集成分刷廠印刷

蜀雅序

今之論人文者。皆以爲取材必於鄧林。視鳥必於藪澤。固已。然而閬風元圃。不借高於坵垤。懸黎結綠。不假觀於瓊珉。何者。拘井谷之隘。不知辰極之高也。澄秋毫之視。不見寥天之闊也。吾蜀詩亦然。自漢唐以來。百家騰躍。指不勝屈。最著者。如漢司馬相如。揚雄。唐李白。陳子昂。宋蘇洵父子。元虞集。明楊慎。作爲文章。類皆沉博絕麗。雄視百代。構深瑋之風。立騷壇之表。洵古今來文雅之淵藪也。殘膏餘馥。不知沾丐後人幾許。而賤目貴耳者。顧謂今不如古。方隅之別也。豈不悖乎。慨自明末獻賊之亂。衣冠文物。半委青羊。我朝定鼎休息。百餘年來。英才蔚起。而岷峨之氣。又磅礴而鬱積之。故往往轢古切今。不少鴻章巨製。軒翥奮飛。和聲以鳴。太平之盛。而以巴爲耀。多不入採風之聽。則是鍾期亡而伯牙之絃絕。獲人歿而匠氏之斤輟。非作之難。知之難也。若不爲之網羅而表張之。有不泯於荒烟蔓草者幾何。余束髮授書來。卽矢此志。廣搜遠探。靡不收錄。披沙揀金。閱有歲時。彙爲一冊。統名曰蜀雅。大半理不空綺。清麗居宗。句不賈奇。渾潤爲上。登大雅而刊淫哇。此中具費苦心也。雖丹幃接蔭。醜姿可翳。朱漆錯塗。枯木或隱。然而出汙泥者。要皆寶光劍氣。譬之止水之修鱗。必現名之美者。實必歸也。司馬楊雄之徒。去今未遠。風雅之道。豈遂墜乎。若夫覽此篇者。存町畛之分。索吹毛之垢。則所謂播塵埃於白珪。生瘡瘡於玉肌者。亦聽之而已。吾安能以人人之性情。爲我之性情哉。是爲序。

蜀雅序

乾隆四十六年歲次辛丑孟冬月羅江李調元雨村撰。

本館據函海本排
印初編各叢書僅
有此本

蜀雅卷一

清 羅江李調元雨村選

呂大器

大器字儼若。號東川。遂寧人。崇正戊辰進士。官至吏部尙書大學士。入國朝。自稱東川老人。有寒

上草。王漁洋皇華紀聞。呂公蜀人。明末。總督江楚。駐九江。會左良玉避賊鋒。遣遙江上。以病自託。楚撫王楊基至臥內視之。良玉使二婢搥脚。儼蹇自如。呂公至。不卽起謁。命孟庚代參。呂公叱之曰。而

父病。軍事不可曠。軍中有可代者。以名來。吾立疏以聞。卽疏遊擊盧鼎各將上之。良玉怒。史公可法移書勉以文武和衷。大器以一扇遺左。款書東川老人四字而已。未幾執議改袁繼威爲督。大器以兵書內召。儼若有

才。督江西時。密布方略。遣將於衡袁萬載萍澄諸路。撲賊殆盡。然善避事。見天下方亂。上疏自言好酒色財。不可用。科臣馬夢植劾之。事見明史。以艱歸。哀毀。入本朝。未幾卒。詩多橫槊之氣。時露粗服。然秀

拔堅渾。終是唐人格調。不著宋元以下蹊徑。靜志居詩話。公驅馳南北。盡瘁行間。五言如野寺依巖。官衙傍水開。孤燈寒殿壁。落月映山城。土瘠蟬吟屋。林疏月上扉。野狐衝馬立。山鬼伺人驕。精衛悲衛土。鷓鴣

啼滿山。雲烟眷尙在。烽火晝相連。淚盡銅駝棘。歌殘玉樹花。豈無丹闕戀。終抱白雲思。忠孝之誠。溢于言表。

晚至閬州

一葉嘉陵下。水心對綠漪。豈無丹闕戀。終抱白雲思。輕艇星前導。微波天暗移。南池千萬折。懷古一增悲。

昭化縣

不堪百戰後。寥落兩三家。白骨堆荒草。青燐亂晚霞。高城行鳥雀。古廟困蒹葭。羣盜中原徧。愁心未有涯。

音旨俱極凄壯。逼似少陵。

泊陽下灘

祇爭一帶水，尙枕小溪眠。漁火穿江出，村烽帶月傳。孤城還屹爾，白叟半蕭然。回憶垂陰處，森森俯大川。

寧遠里唐帝故

唐代新豐市，千年霸業非。誰從歌鳳德，相對有鶉衣。土瘠蟬吟屋，人疎月上扉。傷心興廢地，落葉不堪飛。

蘧江

孤身行萬里，驛路怯星軺。樹密烟邨小，沙平水岸遙。野狐衝馬立，山鬼伺人驕。漸喜南州地，猶看聚晚潮。

潭市

曲澗涵秋雨，人家水鏡中。蜂房緣石竇，虬樹繞花叢。農事悲荒土，鄉心寄暮鴻。徘徊萬里路，何日到春風。

湘潭道中

世路原多險，況經巉巖行。日從當午見，雲向漏天生。果熟猿朝暮，花深鳥送迎。何時出暗谷，一望大江平。

閒居

好山當面出，知我在幽軒。煨芋聊充飯，烹泉不問源。譚元藏史李，學稼小人樊。數得林間趣，花開鳥亦言。

晚次江門

世事何年定，江皋且振衣。樹紅橙子熟，濤白鯉魚肥。獨鳥衝烟去，殘霞壓岸飛。邨醪無處得，空對月光輝。

舟中聞笛

夢餘猶枕午風涼。野笛何心欲斷腸。萬里一身秦塞柳。扁舟五月玉門霜。故園去去雲山盡。白髮穆穆道
路長。不比笳聲頻入耳。擬邀子野到征航。

陽平關酬友人席仲材

山河百二劍鋒摧。漢上猶思召父來。短綆終無弭亂策。中流空詡濟川才。子遺聊與鷓鴣枝。寄大力還須鵬
背回。春築當年亦細事。漫將涕淚灑荒萊。公築陽平關以撫流移。惜後無
有葺之者。結語聲淚俱下。

渡臯蘭作

相隨洮水渡蘭津。高柳垂條麥浪勻。玉塞西馳尊八極。黃河逆轉壯三秦。應教滴博歸荒服。更遣輪臺置
守臣。此日神州煩擘畫。且從徼外洗烟塵。

雪山

光搖旌旆五涼平。天外羣峯玉削成。瀚海欲空青見月。燕支未染白如瓊。飛鴻已度長城窟。勒馬還歌出
塞行。朱夏重裘猶不解。崆峒倚劍自崢嶸。

鎮羌道上有感

鷹眼何堪秋草枯。姑臧清節至今無。籌邊不肯空談虎。策國豈容先問狐。已許此身嚼塞雪。那教家夢到
江鱸。雄風歌罷秋聲壯。古驛亭前倚湛盧。時甘帥不法。甫入境
即行論奏。具見丰稜。

早發古浪

水剽山殘接大川。平沙一望不分天。何從去覓金屠澤。且喜來無鐵箭傳。秋草正肥驕塞馬。寒膠可折勁霜弦。孤城昨夜隄防密。鼓角聲高壓遠邊。

雙塔道上

七月柳青麥未黃。江南花盡塞西霜。一灣清玉流殘磧。萬里寒沙築大荒。劍舞明星緣露淬。弓灣新月倚風強。白狼西去烟初靜。莫唱涼州客思傷。

靖邊作

鳴沙萬里憶芙蓉。午夢猶酣客思慵。戊卒秋新將飲馬。將軍歲久不傳烽。停車無計綢繆戶。乘傳頻勞進午饔。獨坐帳中驚白髮。何堪砌下響秋蛩。

五涼郊行

旌旗畫捲出城闌。緩帶無妨步塞塵。石列魚鱗能次序。山垂瑪瑙自嶙峋。玉川宛轉歸王國。金塔高嚴類古人。莫謂黃沙春不度。朔雲邊柳自芳辰。

落索河有感

百折波濤險。一泓山澗清。天高雲黯淡。巖老石崢嶸。古洞都成穴。諸峯盡築城。版圖猶蜀界。風土半秦聲。杜宇啼方歇。銅駝歎未傾。旌幢連赤縣。烽火到神京。嫠婦徒存恤。羣臣孰請纓。傷予才略淺。深媿李西平。

漠漠濃烟罩萬松。逶迤秋嶺盡成龍。聲寒鐵騎千軍肅。一線遙看古戍峯。
采石磯晚眺

磯頭誰忍坐垂綸。天送閒緣一葉身。烟護萬松三月雨。水圍千舍六朝人。

胡世安

世安號菊潭。井研人。崇正戊辰進士。入國朝。官至大學士。著有秀巖集。石芝軒偶存。容竹居偶存。
譯峨嶺異魚圖贊補箋

和陳實菴同年續峨遊夢

昔年禳噩夢。曾賦憶峨行。天假烟霞供。人寒猿鶴盟。詩瓢雖早辨。斗室未垂成。忽覺移文至。慚余伴俗情。
三遊有譯籟。夙締亦殷勤。靈稱非私我。幽探若待君。陰晴山態易。黑白水情分。到者無他侶。逢迎只素雲。
勝峯雲海涵。培塿赤城標。騎殺方追葛。驂鸞亦遇蕭。春遲巖北秀。夏減日南驕。旅夢依青岫。評題總竊描。
鹵嶠棄風便。寒潭濯魄澄。山朝聞靜籟。樹古引蒼藤。蜥蜴充龍號。貔貅學狔登。同人隨降陟。濟勝具偏增。
李鑑

鑑字涵白。安縣人。崇正戊辰進士。累官宣雲巡撫。入國朝。陞總督宣大三鎮。再總督河道。卒。

寄桃源陳器之明府

龍淵白鶴不易知。切玉追風乃見奇。古來神物多自闕。觚稜炫耀徒區區。陳侯落落原靜者。十年投分支。

山下抱兒當戶不聞聲。桐陰深巷無車馬。海門浪蹴樓船湧。黑雲壓城山欲動。日日兵前喘息微。輿臺攘臂誇拳勇。是時陳侯方閉關。予亦跼蹐闔堵間。投詩引我入勝地。得酒時爲破愁顏。風塵一別年來久。顏色常思別離後。飛龍天上不可攀。空向童峯回白首。湖南清絕古今稱。羨君臥理稱神明。到日已聞齊買犢。至今還似未經兵。始知才大成常晚。汗血霜鬬絳一展。丈夫騰蹕亦有時。未擬蹉跎嗟歲晏。君不見白頭浪高潞陽深。九嶷綿亘青楓林。側身南望思公子。沅芷澧蘭知我心。

柳寅東

寅東字鳳瞻。梓潼人。崇正辛未進士。官至僉都御史。入國朝。寓居維揚。有來鶴堂詩集。鄧孝威云。解職。僑居維揚。與諸大老相倡和。詩在眉山。劍南尚。而造意命格。有游于盛唐闡域處。

和胡宗伯菊潭夢遊峨眉眉山

三峨不可卽。遠在西南偏。白日迷歸路。青天上睡僊。鉢馴龍子蟄。樹闔定僧禪。栩栩遽然後。逍遙再著篇。八十四盤道。懸崖撒手行。將迴西日馭。欲踐北山盟。見雪知盤古。因風問廣成。緬懷王逸少。未至已馳情。家山十載別。客路半生勤。處世覺同夢。入林吾與君。深溪憑虎渡。聖水自龍分。想見詩囊裏。兜羅上界雲。

望泰山

遂古誰開闢。東維奠奧區。廢輿輪日月。封禪遞唐虞。山呼去聲。今天子。松傳古大夫。長生如可學。應有白雲都。

王範

範字慕吉。內江人。崇正辛未進士。官至巡按浙江御史。蜀亂不仕。國朝寓居丹陽。

慕吉先知丹陽。清勤有能聲。公

餘隱處。解後一室。三年未嘗入內。丹陽人素德之。寓居時。贈送薪米不絕云。

崇正宮詞

水殿風搖楊柳絲。先皇朝罷獨憂時。抽毫却寫賢臣頌。面勅中涓賜主兒。

自注。故宮人左氏。今爲民間浣衣婦。能言掖庭舊事。云宮中稱皇太

子曰主兒。

慈寧宮禁老莓苔。元日驚傳法從來。上下隔簾遙拜畢。六龍飛輅一時回。

懿安皇后居慈寧宮。帝朝后不相見。於簾內答兩拜。

宗敦一

敦一字凌霄。宜賓人。崇正辛未進士。歷官江南巡按。督學御史。入國朝。進通政使。督學順天。

卽事

寒夜挑燈檢敝囊。客心無奈轉旁皇。只存一幅胡威絹。拭得酬恩淚幾行。

蜀雅卷二

費經虞

經虞字仲若號鮮民新繁人崇正己卯舉人官至雲南昆明令遷廣西知府入國朝卒有荷衣集

仲若父嘉謨明末以明經授大竹教諭善詩詞生四子仲若其季也事親以孝聞令昆明時廉潔端謹民愛戴之士官吳必奎反討平之驗閱武定浮民全活甚衆擢雲南同知再遷知府不之官歸里著書人服其高介事見通志仲若當蜀亂之後獨能以詩學世其家其子密其孫錫琮錫璜俱以詩鳴蜀再傳不替可謂有鳳毛矣

往定軍山下潘氏授徒崇正年作

國亂民生蹙西南久困兵流離心不定鄉塾事猶清花啓新蓬戶書傳舊讀聲一官如夢斷垂老只諸生
喜張象獅至揚州話舊

吾子何時至鄉音入耳新久爲吳地客終是蜀山人沽酒坐中夜看花到暮春百年才論定只恐媿芳隣
所聞

共傳徐元直尙在南山雲我欲從之去高峯麋鹿羣瀑寒留古響松老亂蘿文別有閒田宅種花無夕曛
上梅花嶺

傳說隋朝苑蒼茫煙樹空殘陽迷野寺古驛向江東一代高原後孤墳亂草中逢人求故事何客號于嵩
揚州北郭有史相公墓

遣兒密往褒城授徒

送汝出門去。高堂淚黯然。病來今更瘦。亂後久無錢。斑白來千里。全家食一編。艱難宜力學。大父是先賢。

定軍山下村居

倦起披衣獨上臺。白雲紅樹一重開。石泉香透花長落。木葉聲乾雨乍來。觀物未能忘舊事。避人稍欲著新裁。耆年何處歌商調。扶病相從聽上哀。

自漢中攜家往江南

蕭條故國賦東征。白首攜家萬里行。珠樹有禽隨我隱。玉山無地傍誰畊。餘生已覺羞錢柄。舊曲何堪更羽聲。夜起呼兒同玩月。老夫不是爲多情。

雪

高城臨水浩無涯。雪片飛來奪月華。天上遂教殘玉樹。人間重與種瓊花。丁年絕域迷歸路。寒夜孤舟未抵家。吳越乍聞歌楚調。空流老淚向琵琶。

思蜀

垂老無家只自憐。不堪往事益淒然。當門慈竹八千里。昨日疎梅二十年。旣使丁男安稼穡。遂無姓氏到風烟。春時更覺傷人意。寒食青青麥滿田。

揚州春日

緩步西郊日欲曛。水流花發又春分。久無弟子傳秋駕。空有佳人隔暮雲。沒盡雙鴻聲尚在。飛來小鳥食爲羣。興酣思續蕪城賦。老大悲傷不好文。

歸田吟

出山未達便無家。結屋青城上紫霞。手版何曾成一事。幾年辜負碧桃花。家破猶餘半畝塘。杜鵑啼處柳絲長。騎牛不到人間去。白髮蕭蕭晒夕陽。

王新命

新命字純嘏。潼川人。官至河道總督。有東山集。

詩最純嘏年甫十二。賊目張獻忠攻潼。潼陷。一家七十餘口皆被害。公匿文昌廟土穴中。乃免。風鶴驚惶。東西

奔竄。大兵入蜀時。公年十五矣。艱苦流離。難更僕數。後以諸生補筆帖式。旋授中書舍人。量移柏府都事。尋轉樞部車駕司員外郎。出使滇南。逆藩攝之。不屈。還朝。永幾卽有巡撫湖北之命。政聲茂著。君相稱賢。尋陞河東總督。聖寵特隆。細按其平生。少習帖括。長閱經史。以及天文、地理、方輿、象數、兵農、理學之書。靡不究覽。居官時以坦容養性。以恬適怡情。休休乎有房杜之風焉。

使滇

祇命來南服。馳驅輕萬里。聖治洽寰區。滇池跋扈起。元濟爲戎首。干戈懾天使。我徒烈丈夫。成仁取義耳。從容誓天日。慷慨存廉恥。上以壯國威。下以光青史。幽拘夢寐清。惟礪睢陽齒。

別江右

昔來南浦日。此地只孤城。黽勉行吾拙。艱難任世情。有心籌國用。無力贍民生。贏得清風好。飄然兩袖輕。